



## AN tAONTAS EORPACH

PARLAIMINT NA hEORPA

AN CHOMHAIRLE

An Bhruiséil, 30 Aibreán 2024  
(OR. en)

2024/0073(COD)

PE-CONS 75/24

AGRI 263  
AGRIFIN 36  
AGRIORG 46  
AGRILEG 179  
CODEC 884

### GNÍOMHARTHA REACTACHA AGUS IONSTRAIMÍ EILE

Ábhar: RIALACHÁN Ó PHARLAIMINT NA hEORPA AGUS ÓN gCOMHAIRLE lena leasaítear Rialacháin (AE) 2021/2115 agus (AE) 2021/2116 a mhéid a bhaineann le caighdeáin maidir le dea-riocht talmhaíochta agus comhshaoil, scéimeanna aeráide, comhshaoil agus leasa ainmhithe, leasuithe ar Phleananna Straitéiseacha CBT, athbhreithniú ar Phleananna Straitéiseacha CBT agus díolúintí ó rialuithe agus pionóis

**RIALACHÁN (AE) 2024/...**  
**Ó PHARLAIMINT NA hEORPA AGUS ÓN gCOMHAIRLE**

**an ...**

**lena leasaítear Rialacháin (AE) 2021/2115 agus (AE) 2021/2116  
a mhéid a bhaineann le caighdeáin maidir le dea-riocht talmhaíochta agus comhshaoil,  
scéimeanna aeráide, comhshaoil agus leasa ainmhithe, leasuithe  
ar Phleananna Straitéiseacha CBT, athbhreithniú ar Phleananna Straitéiseacha CBT  
agus díolúintí ó rialuithe agus pionóis**

TÁ PARLAIMINT NA hEORPA AGUS COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh, agus go háirithe Airteagal 43(2) de,

Ag féachaint don togra ón gCoimisiún Eorpach,

Tar éis dóibh an dréachtghníomh reachtach a chur chuig na parlaimintí náisiúnta,

Ag féachaint don tuairim ó Choiste Eacnamaíoch agus Sóisialta na hEorpa<sup>1</sup>,

Ag gníomhú dóibh i gcomhréir leis an ngnáthnós imeachta reachtach<sup>2</sup>,

---

<sup>1</sup> Nár foilsíodh fós san Iris Oifigiúil.

<sup>2</sup> Seasamh ó Pharlaimint na hEorpa an 24 Aibreán 2024 (nár foilsíodh fós san Iris Oifigiúil) agus cinneadh ón gComhairle an ... .

De bharr an mhéid seo a leanas:

- (1) Le Rialachán (AE) 2021/2115 ó Pharlaimint na hEorpa agus ón gComhairle<sup>3</sup>, bunaítear rialacha maidir le tacaíocht do phleananna straitéiseacha atá le tarraingt suas ag na Ballstáit faoin gcomhbheartas talmhaíochta ('Pleananna Straitéiseacha CBT') agus le maoiniú ag an gCiste Eorpach um Ráthaíocht Talmhaíochta (CERT) agus ag an gCiste Eorpach Talmhaíochta um Fhorbairt Tuaithe (CETFT). Le Rialachán (AE) 2021/2116 ó Pharlaimint na hEorpa agus ón gComhairle<sup>4</sup>, bunaítear rialacha maidir leis an gcomhbheartas talmhaíochta (CBT) a mhaoiniú, a bhainistiú agus faireachán a dhéanamh air.
- (2) D'ainneoin go dtugtar solúbthacht shubstaintiúil do na Ballstáit le Rialachán (AE) 2021/2115 agus (AE) 2021/2116 agus go bhféadfadh siad ualaí riaracháin ar fheirmeoirí a laghdú, léiríodh go soiléir sa chéad bhliain de chur i bhfeidhm nithiúil na Rialachán sin, trí Phleananna Straitéiseacha CBT, go bhfuil gá le coigeartuithe teoranta áirithe ar chreat dlíthiúil an Aontais le haghaidh CBT chun cur chun feidhme éifeachtach na bPleananna Straitéiseacha CBT a áirithiú agus chun an t-ualach riaracháin a bhaineann le cur chun feidhme na bPleananna Straitéiseacha CBT agus le rialú ceanglas áirithe a laghdú.

---

<sup>3</sup> Rialachán (AE) 2021/2115 ó Pharlaimint na hEorpa agus ón gComhairle an 2 Nollaig 2021 lena mbunaítear rialacha maidir le tacaíocht do phleananna straitéiseacha atá le tarraingt suas ag na Ballstáit faoin gcomhbheartas talmhaíochta (Pleananna Straitéiseacha CBT) agus le maoiniú ag an gCiste Eorpach um Ráthaíocht Talmhaíochta (CERT) agus ag an gCiste Eorpach Talmhaíochta um Fhorbairt Tuaithe (CETFT) agus lena n-aisghairtear Rialacháin (AE) Uimh. 1305/2013 agus (AE) Uimh. 1307/2013 (IO L 435, 6.12.2021, lch. 1, ELI: <http://data.europa.eu/eli/reg/2021/2115/oj>).

<sup>4</sup> Rialachán (AE) 2021/2116 ó Pharlaimint na hEorpa agus ón gComhairle an 2 Nollaig 2021 maidir leis an gcomhbheartas talmhaíochta a mhaoiniú, a bhainistiú agus faireachán a dhéanamh air agus lena n-aisghairtear Rialachán (AE) Uimh. 1306/2013 (IO L 435, 6.12.2021, lch. 187, ELI: <http://data.europa.eu/eli/reg/2021/2116/oj>).

- (3) Ina theannta sin, tá raon eisceachtúil deacrachtaí agus éiginnteachtaí roimh fheirmeoirí. Go háirithe, tá líon suntasach teagmhas meitéareolaíoch foircneach ann le cúpla bliain anuas, lena n-áirítear triomaigh agus tuilte i gcodanna éagsúla den Aontas. Leis na teagmhais sin, déantar difear d'aschur agus d'ioncam, agus bíonn tionchar suntasach acu freisin ar chur i gcrích agus féilire na ngnáthchleachtas agranamaíoch. Mar gheall ar na praghsanna arda fuinnimh agus ionchuir agus na héiginnteachtaí a d'eascair as cogadh foghach na Rúise in aghaidh na hÚcráine, na costais mhaireachtála, an boillsciú, an laghdú in 2023 ar luach táirgthe gránach agus an t-athrú ar shreafaí trádála idirnáisiúnta, tá tuilleadh éiginnteachtaí agus brúnna roimh fheirmeoirí. Nuair a tharlaíonn na teagmhais sin an tráth céanna, cuirtear brú mór ar fheirmeoirí bainistiú a ngabháltas agus cur i gcrích na gcleachtas agranamaíoch a oiriúnú, mar bhainisteoirí acmhainní nádúrtha agus mar ghníomhaithe eacnamaíocha.
- (4) Mar thoradh air sin, is gá athbhreithniú agus simpliú a dhéanamh ar fhorálacha áirithe Rialacháin (AE) 2021/2115 agus (AE) 2021/2116 chun a áirithiú gur féidir leis na Ballstáit a bPleananna Straitéiseacha CBT a oiriúnú níos fearr do riachtanais feirmeoirí agus níos mó solúbthachta a thabhairt d'fheirmeoirí chun a ngníomhaíochtaí talmhaíochta a dhéanamh, agus na dúshlán mhéadaitheacha, dothuarthacht na haimsire agus na héiginnteachtaí eacnamaíocha á gcur san áireamh.

(5) Le hAirteagal 13 de Rialachán (AE) 2021/2115, ceanglaítear ar na Ballstáit a áirithiú go gcoinnítear gach limistéar talmhaíochta, lena n-áirítear talamh nach n-úsáidtear a thuilleadh chun críoch táirgthe, i ndea-riocht talmhaíochta agus comhshaoil. Tá na Ballstáit leis na híoschaighdeáin d'fheirmeoirí agus tairbhíthe eile a shocrú, ar an leibhéal náisiúnta nó réigiúnach, le haghaidh gach ceann de na caighdeáin maidir le dea-riocht talmhaíochta agus comhshaoil (GAEC) a liostaítear in Iarscríbhinn III a ghabhann leis an Rialachán sin, i gcomhréir le príomhchuspóir gach ceann de na caighdeáin sin dá dtagraítear san Iarscríbhinn sin. Bíonn tionchar ag go leor tosca ar chuspóirí foriomlána na cosanta ithreach agus na cáilíochta ithreach a shaothraítear le caighdeáin GAEC 5, 6 agus 7, amhail cineál ithreach, na barra a roghnaítear, dálaí aeráide agus aimsire, agus an úsáid talún faoi láthair agus san am atá caite agus córais feirmeoireachta faoi láthair agus san am atá caite, amhail an fheirmeoireacht orgánach a éilíonn cur chuige difriúil i leith oibríochtaí áirithe. Is léir ón taithí a fuarthas, i gcás ina bhforchuirtear ceanglais áirithe gan aird chuí a thabhairt ar na tosca sin, amhail srianta ar churaíocht nó oibleagáidí cur le linn tréimhse shonrach, go bhféadfadh sé go mbeadh tionchar diúltach aige sin ar ithreacha áirithe nó ar bharrá áirithe, agus go mbeadh riosca ann fiú go gcuirfí in aghaidh chuspóir na cosanta ithreach. Le caighdeán GAEC 9, cuirtear cosc ar fhéarthailte buana a thiontú nó a threabhadh, ar féarthailte buana iad atá ainmnithe mar fhéarthailte buana íogaire comhshaoil i láithreáin Natura 2000. Mar sin féin, is léir ón taithí a fuarthas go bhféadfadh sé go mbeadh cásanna eisceachtúla ann ina ndéantar damáiste d'fhéarthalamh buan íogair comhshaoil den sórt sin, mar shampla damáiste mar gheall ar ainmhithe fiáine nó speicis ionracha, agus go bhféadfadh gá a bheith le bearta iomchuí chun aghaidh a thabhairt ar chásanna den sórt sin, lena n-áirítear eisceachtaí ón gcosc ar threabhadh na limistéar lena mbaineann chun féarthalamh buan den sórt sin a athbhunú, chun a áirithiú go rannchuidíonn ceanglais chaighdeán GAEC 9 le cosaint na ngnáthóg agus na speiceas.

- (6) Mar thoradh ar an líon teagmhas meitéareolaíoch foircneach agus cásanna ina ndéantar damáiste d'fhéarthailte buana atá ainmnithe mar fhéarthailte buana íogaire comhshaoil, líon atá ag dul i méid mar gheall ar thosca amhail ainmhithe fiáine nó speicis ionracha, éiríonn fadhbanna sonracha a thagann roimh fheirmeoirí agus ceanglais chaighdeán GAEC 5, 6, 7 agus 9 á gcur i bhfeidhm acu, ar fadhbanna iad nach mór do na Ballstáit aghaidh a thabhairt orthu. Tá baol ann freisin go mbeadh ceanglais den sórt sin díréireach i bhfianaise a rannchuidithe iarbhír le cuspóir na cosanta a bhaint amach i gcás chaighdeán GAEC 5, 6 agus 7 agus an cuspóir a bhaint amach maidir le cosaint na ngnáthóg agus na speiceas i gcás chaighdeán GAEC 9. Chun cásanna den sórt sin a sheachaint, ba cheart cead a bheith ag na Ballstáit díolúintí sonracha ó chaighdeán GAEC 5, 6, 7 agus 9 a bhunú chun aghaidh a thabhairt ar fhadhbanna sonracha a bhaineann le cur i bhfeidhm na gcaighdeán GAEC sin bunaithe ar chritéir oibiachtúla agus neamh-idirdhealaitheacha, amhail cineálacha ithreach, barra nó córais feirmeoireachta nó damáiste d'fhéarthailte buana, inter alia, mar gheall ar ainmhithe fiáine nó speicis ionracha. Ba cheart na díolúintí sin a bheith teoranta i dtéarmaí a gcumhdaigh limistéir agus níor cheart dóibh bac a chur ar rannchuidiú na gcaighdeán sin lena bpríomhchuspóirí, mar a liostaítear in Iarscríbhinn III a ghabhann le Rialachán (AE) 2021/2115, a bhaint amach.

- (7) Maidir le dálaí aimsire agus an tionchar a bheadh acu sin ar dhálaí i limistéir talmhaíochta, d'fhéadfadh sé sin cosc a chur ar fheirmeoirí agus ar thairbhithe eile ceanglais chaighdeáin GAEC a chomhlíonadh, amhail teorainneacha ama agus tréimhsí le haghaidh oibríochtaí, in aon bhliain ar leith. Chun an cás a sheachaint ina mbeadh sé d'oibleagáid ar fheirmeoirí a bhfuil orthu aghaidh a thabhairt ar cheanglais den sórt sin, mar shampla, barra a chur faoi dháta áirithe nuair nach féidir na hoibríochtaí is gá a dhéanamh mar gheall ar na dálaí aimsire in aon bhliain ar leith nó nach féidir iad a dhéanamh gan tionchar diúltach tromchúiseach a bheith ar an ithir, amhail balcadh ithreach, ba cheart do na Ballstáit a bheith in ann, agus na híoschaighdeáin maidir le dea-riocht talmhaíochta agus comhshaoil á gcur chun feidhme acu de bhun Rialachán (AE) 2021/2115, foráil a dhéanamh maidir le maoluithe sealadacha ar na ceanglais sin. Ba cheart maoluithe sealadacha den sórt sin a bheith teoranta i dtéarmaí a raoin feidhme d'fheirmeoirí agus do thairbhithe eile nó do limistéir dá ndéantar difear mar gheall ar na dálaí aimsire lena mbaineann, agus níor cheart do na Ballstáit iad a chur i bhfeidhm ach ar feadh na tréimhse a bhfuil fíorghá leo.

- (8) Le Rialachán (AE) 2021/2115, déantar foráil maidir le roinnt eilimintí agus uirlisí do na Ballstáit chun aghaidh a thabhairt ar an gcuspóir sonrach dá dtagraítear in Airteagal 6(1), pointe (f), den Rialachán sin, mar atá rannchuidiú le cailliúint na bithéagsúlachta a stopadh agus í a aisiompú, seirbhísí éiceachórais a fheabhsú agus na gnáthóga agus tírdhreacha a chaomhnú. Ceann de na heilimintí sin is ea an córas coinníollachta. Go háirithe, i gcaighdeán GAEC 8, a liostaítear in Iarscríbhinn III a ghabhann leis an Rialachán sin, tá roinnt ceanglas, lena n-áirítear oibleagáid sciar áirithe de thalamh arúil a dhíriú ar limistéir agus gnéithe neamhtháirgiúla. Is é príomhchuspóir chaighdeán GAEC 8 gnéithe agus limistéir neamhtháirgiúla a chothabháil chun an bhithéagsúlacht ar an bhfeirm a fheabhsú. Tá na Ballstáit in ann freisin idirghabhálacha a dheardh lena dtacaítear leis an gcuspóir sin, amhail éiciscéimeanna chun gníomhaíochtaí a chumhdach de bhun Airteagal 31 de Rialachán (AE) 2021/2115. I gcomhthéacs na ndúshlán agus na n-éiginnteachtaí a eascraíonn as teagmhais dhíobhálacha agus éiginnteachtaí eacnamaíocha a bheith ann an tráth céanna, is léir ón taithí a fuarthas gur gá an chothromaíocht idir na huirlisí beartais éagsúla a rannchuidíonn le cosaint agus feabhsú na bithéagsúlachta a choigeartú chun níos mó solúbthachta a thabhairt d'fheirmeoirí chun rannchuidiú leis an gcuspóir sin a bhaint amach ag brath ar chás sonrach a ngabháltas agus chun cúiteamh airgeadais feabhsaithe a sholáthar as rannchuidiú den sórt sin.

- (9) Go sonrath, an oibleagáid maidir le sciar de thalamh arúil a dhíriú ar limistéir agus gnéithe neamhtháirgiúla, ós rud é go bhforáiltear don oibleagáid sin faoin gcéad cheanglas de chaighdeán GAEC 8 faoi láthair, mar a liostaítear in Iarscríbhinn III a ghabhann le Rialachán (AE) 2021/2115, ní mór d'fheirmeoirí atá ag cur isteach ar íocaíochtaí díreacha agus idirghabhálacha dá dtagraítear in Airteagail 70, 71 agus 72 den Rialachán sin an ceanglas sin a urramú gan aon chúiteamh ar na costais a tabhaíodh ná ar an ioncam a tarscaoileadh. I gcásanna áirithe, d'fhéadfadh ualach airgeadais suntasach a bheith i gceist leis sin ar na feirmeoirí agus na tairbhíthe lena mbaineann, go háirithe ós rud é nach féidir aon táirgeadh barr ná ainmhithe a dhéanamh ar an talamh arúil atá dírithe ar limistéir nó gnéithe neamhtháirgiúla faoi chaighdeán GAEC 8. I bhfianaise an ualaigh agus na n-iarmhairtí d'fheirmeoirí áirithe agus raon eisceachtúil na ndeacrachtaí agus na n-éiginnteachtaí atá rompu, is fearr a thabharfaí aghaidh ar an ngá atá le limistéir agus gnéithe neamhtháirgiúla a bheith ar thalamh arúil trí uirlis lena dtabharfaí níos mó solúbthachta agus, níos tábhachtaí ná sin, lena dtabharfaí dreasacht trí chúiteamh a sholáthar ar a laghad as cuid de na costais a tabhaíodh agus den ioncam a tarscaoileadh a bhaineann le limistéir agus gnéithe neamhtháirgiúla den sórt sin. Dá réir sin, ba cheart Airteagal 31 de Rialachán (AE) 2021/2115 a leasú chun a áirithiú go soláthraíonn na Ballstáit tacaíocht d'éciscéimeanna lena gcumhdaítear, ar thalamh arúil, cleachtais chun limistéir neamhtháirgiúla a chothabháil, amhail talamh atá gan chur, agus chun gnéithe tírdhreacha nua a bhunú.

- (10) An tráth céanna, ba cheart an córas coinníollachta a bunaíodh le Rialachán (AE) 2021/2115 a choigeartú tríd an oibleagáid sciar de thalamh arúil a dhíriú ar limistéir agus gnéithe neamhtháirgiúla gcéad cheanglas a bhaint de chaighdeán GAEC 8 mar a liostaítear in Iarscríbhinn III a ghabhann leis an Rialachán sin. An oibleagáid gnéithe tírdhreacha a choinneáil agus an cosc ar fhálta agus crainn a ghearradh le linn shéasúr goir agus tógála na n-éan, atá ina gcuid de cheanglais chaighdeán GAEC 8 faoi láthair, ba cheart iad a choinneáil ar bun mar chuid den chóras coinníollachta chun a áirithiú go gcosnaítear gnéithe tírdhreacha limistéar talmhaíochta atá ann cheana.
- (11) Ba cheart solúbthacht bhreise a thabhairt do na Ballstáit chun a bPleananna Straitéiseacha CBT a leasú, agus cobhsaíocht agus inbhainistitheacht na bPleananna Straitéiseacha CBT, mar aon le héifeachtúlacht riaracháin an phróisis chun leasuithe a dhéanamh, á n-áirithiú an tráth céanna. Is léir ón taithí a fuarthas gur féidir é a bheith dúshlánach aghaidh a thabhairt ar riachtanais shonracha CERT agus CETFT araon in aon iarraidh amháin ar leasú. An tráth céanna, ba cheart teorainn a chur le líon na leasuithe in aghaidh na bliana féilire chun a áirithiú go bhfuil a ndóthain ama ag feirmeoirí agus ag na tairbhithe eile chun na leasuithe sin a chur san áireamh, agus chun an t-ualach riaracháin ar na Ballstáit a theorannú agus chun é a chur ar a chumas don Choimisiún measúnú a dhéanamh ar chomhoiriúnacht na leasuithe sin le creat dlíthiúil an Aontais a leagtar síos i Rialacháin (AE) 2021/2115 agus (AE) 2021/2116 laistigh de na teorainneacha ama a leagtar amach sa chreat dlíthiúil sin. Ar na cúiseanna sin, ba cheart uaslíon na n-iarrataí ar leasuithe ar Phleananna Straitéiseacha CBT a mhéadú go dtí dhá iarraidh ar leasú in aghaidh na bliana féilire, i dteannta an trí iarraidh bhreise ar leasú an Phlean Straitéisigh CBT a fhéadfar a thíolacadh i gcomhréir le hAirteagal 119(7) de Rialachán (AE) 2021/2115.

- (12) I gcomhréir le hAirteagal 120 de Rialachán (AE) 2021/2115, tá sé d'oibleagáid ar na Ballstáit measúnú a dhéanamh i dtaobh cé acu is gá nó nach gá a bPleananna Straitéiseacha CBT a leasú i gcás leasú ar ghníomhartha reachtacha a liostaítear in Iarscríbhinn XIII a ghabhann leis an Rialachán sin agus fógra a thabhairt don Choimisiún faoi mheasúnuithe den sórt sin laistigh de spriocdháta áirithe. Ós rud é go raibh ualach mór ar na Ballstáit mar gheall ar an oibleagáid sin agus gur cheart na hiarrachtaí a bheadh ar na Ballstáit a chaitheamh murach sin sa mheasúnú ar feadh a bhfuil fágtha de chlárthréimhse na bPleananna Straitéiseacha CBT reatha a bheith teoranta, níor cheart feidhm a bheith ag an oibleagáid sin maidir le leasuithe ar ghníomhartha reachtacha a liostaítear in Iarscríbhinn XIII, ar leasuithe iad a thagann i bhfeidhm tar éis an 31 Nollaig 2025.
- (13) Is léir ón taithí a fuarthas go gcruthaítear dúshlán d'fheirmeoirí i gcás ina dtarlaíonn roinnt teagmhas díobhálach an tráth céanna, rud a éilíonn solúbthacht mhéadaithe agus simpliú a dhéanamh ar chur chun feidhme na bPleananna Straitéiseacha CBT, maidir le caighdeáin GAEC áirithe a liostaítear in Iarscríbhinn III a ghabhann le Rialachán (AE) 2021/2115.

- (14) Is é príomhchuspóir chaighdeán GAEC 6, mar a liostaítear in Iarscríbhinn III a ghabhann le Rialachán (AE) 2021/2115, ithir a chosaint sna tréimhsí is íogaire trí bhíthin ceanglas go mbeadh cumhdach íosta ithreach ann chun ithreacha loma a sheachaint i dtréimhsí íogaire den sórt sin. Níos mó ná mar is amhlaidh i gcás caighdeán GAEC eile, déantar difear do dhearadh agus cur chun feidhme na gceanglas faoi chaighdeán GAEC 6 mar gheall ar raon leathan tosca. Go háirithe, d'fhéadfaí an cumhdach íosta ithreach a áirithiú ar bhealaí éagsúla a bhraitheann ní hamháin ar dhálaí ithreach agus aeráide, ach freisin ar thosca amhail an barr a roghnaítear agus fad an tséasúir fáis in aon bhliain ar leith. Ina theannta sin, d'fhéadfadh tréimhsí íogaire éagsúla a bheith ann ag brath go háirithe ar dhálaí sonracha ithreach agus aeráide. Thairis sin, agus roghanna táirgeachta agus, go háirithe, cinntí curtha á ndéanamh acu, ní mór d'fheirmeoirí agus do thairbhíthe eile a bheith in ann réiteach a dhéanamh idir ceanglais chaighdeán GAEC 6 agus dálaí aimsire dothuartha. I bhfianaise na dtosca sin, ba cheart do na Ballstáit a bheith in ann ceanglais chaighdeán GAEC 6 a bhainistiú ar bhealach níos solúbtha ná ceanglais caighdeán GAEC eile agus ar bhealach lena n-áirithítear rannchuidiú ceanglas den sórt sin le baint amach phríomhchuspóir an chaighdeán sin, agus raon tosca, amhail dálaí ithreach agus aeráide, á gcur san áireamh.

- (15) Ba cheart cead a bheith ag na Ballstáit, dá bhrí sin, príomheilimintí chaighdeán GAEC 6 a chinneadh agus achoimre a dhéanamh orthu ina bPleananna Straitéiseacha CBT i gcomhréir le hAirteagal 109(2), pointe (a), de Rialachán (AE) 2021/2115. Dá bhrí sin, ba cheart don Choimisiún a áirithiú, i gcomhréir le hAirteagail 13(1), Airteagal 109(2) agus Airteagail 118 agus 119 den Rialachán sin, go bhfuil príomheilimintí chaighdeán GAEC 6, arna gcinneadh ag na Ballstáit, ar an iomlán, i gcomhréir le príomhchuspóir an chaighdeáin GAEC sin.
- (16) Is é príomhchuspóir chaighdeán GAEC 7, mar a liostaítear in Iarscríbhinn III a ghabhann le Rialachán (AE) 2021/2115, acmhainn ithreach a chaomhnú. Ós rud é go bhféadfadh éagsúlú barr a bheith ina rannchuidiú freisin le hacmhainn ithreach a chaomhnú agus, an tráth céanna, a bheith níos simplí d'fheirmeoirí áirithe a chur chun feidhme i gcomhthéacs an iliomad brúnna agus dúshlán atá rompu faoi láthair, ba cheart do na Ballstáit a bheith in ann a cheadú d'fheirmeoirí caighdeán GAEC 7 a chomhlíonadh freisin trí éagsúlú barr. Dá bhrí sin, ba cheart íoscheanglais maidir le héagsúlú barr a bhunú.

- (17) Tá sé tábhachtach go leanfadh CBT de bheith ina rannchuidiú leis na cuspóirí comhshaoil a leagtar amach in Airteagal 6(1), pointí (d), (e) agus (f) de Rialachán (AE) 2021/2115 trí na ceanglais coinníollachta. Tá sé tábhachtach freisin go n-áiritheofaí cobhsaíocht na gceanglas sin mar bhonnlíne choiteann do na Ballstáit agus d'fheirmeoirí. Dá bhrí sin, ba cheart do na ceanglais coinníollachta i Rialachán (AE) 2021/2115 leanúint d'fheidhm a bheith acu maidir le gach feirmeoir. Mar sin féin, an t-ualach riaracháin a bhaineann leis na rialuithe le haghaidh na gceanglas coinníollachta sin dá bhforáiltear i Rialachán (AE) 2021/2116, is féidir leis a bheith díréireach ard d'fheirmeoirí beaga agus do riaracháin náisiúnta. Dá bhrí sin, i dteannta na solúbthachtaí a mhéid a bhaineann le caighdeáin GAEC 6, 7 agus 8, ba cheart an t-ualach ar fheirmeoirí beaga agus ar riaracháin náisiúnta a bhaineann leis na rialuithe dá bhforáiltear i Rialachán (AE) 2021/2116 a laghdú. Maidir le feirmeoirí a bhfuil uasmhéid gabháltais nach mó ná 10 heicteár de limistéar talmhaíochta acu, ba cheart, dá bhrí sin, iad a dhíolmhú ó na rialuithe coinníollachta a mhéid a bhaineann le ceanglais reachtúla bainistíochta faoi dhlí an Aontais agus ceanglais maidir le dea-riocht talmhaíochta agus comhshaoil. Ós rud é gur 65 % de thairbhíthe CBT atá i bhfeirmeoirí beaga den sórt sin ach nach bhfuil acu ach thart ar 10 % den limistéar talmhaíochta iomlán, dhéanfaí, leis an díolúine sin, an obair a shimpliú le haghaidh roinnt mhaith feirmeoirí agus riaracháin náisiúnta gan bac suntasach a chur ar rannchuidiú na gceanglas coinníollachta lena gcuspóirí a bhaint amach.
- (18) Ós rud é go bhfuil an limistéar talmhaíochta atá á bhainistiú ag feirmeoirí beaga teoranta agus go mbíonn na pionóis íseal i gcoitinne d'fheirmeoirí beaga, d'fhéadfadh sé go gcuirfeadh cur i bhfeidhm pionós ualach díréireach ar riaracháin na mBallstát. Dá bhrí sin, ba cheart feirmeoirí beaga atá díolmhaithe ó na rialuithe coinníollachta a dhíolmhú freisin ó chur i bhfeidhm pionós riaracháin i gcás neamhchomhlíonadh na gceanglas coinníollachta.

- (19) Chun costais riaracháin iomarcacha agus ualaí riaracháin iomarcacha a bhaineann le rialuithe maidir le coinníollacht agus tras-chomhlíonadh a sheachaint, tairbhíthe a fhaigheann íocaíochtaí limistéarbhunaithe faoi Phlean Straitéiseach CBT de bhun Rialachán (AE) 2021/2115 agus faoi chlár forbartha tuaithe a chuirtear chun feidhme faoi Rialachán (AE) Uimh. 1305/2013 ó Pharlaimint na hEorpa agus ón gComhairle<sup>5</sup> go dtí an 31 Nollaig 2025, agus, dá bhrí sin, atá faoi réir rialuithe coinníollachta de bhun Rialachán (AE) 2021/2116, ba cheart iad a dhíolmhú ó rialuithe tras-chomhlíonta agus ó chur i bhfeidhm pionós de bhun Rialachán (AE) Uimh. 1306/2013 ó Pharlaimint na hEorpa agus ón gComhairle<sup>6</sup>.
- (20) Ós rud é nach féidir leis na Ballstáit cuspóir an Rialacháin seo, eadhon aghaidh a thabhairt ar an raon eisceachtúil deacrachtaí agus éiginnteachtaí atá roimh fheirmeoirí trí athbhreithniú agus simpliú a dhéanamh ar fhorálacha áirithe Rialacháin (AE) 2021/2115 agus (AE) 2021/2116, a ghnóthú go leordhóthanach agus gur fearr is féidir iad a ghnóthú ar leibhéal an Aontais, féadfaidh an tAontas bearta a ghlacadh, i gcomhréir le prionsabal na coimhdeachta a leagtar amach in Airteagal 5 den Chonradh ar an Aontas Eorpach (CAE). I gcomhréir le prionsabal na comhréireachta a leagtar amach san Airteagal sin, ní théann an Rialachán seo thar a bhfuil riachtanach chun an cuspóir sin a ghnóthú.

---

<sup>5</sup> Rialachán (AE) Uimh. 1305/2013 ó Pharlaimint na hEorpa agus ón gComhairle an 17 Nollaig 2013 maidir le tacaíocht d'fhorbairt tuaithe ón gCiste Eorpach Talmhaíochta um Fhorbairt Tuaithe (CETFT) agus lena n-aisghairtear Rialachán (CE) Uimh. 1698/2005 ón gComhairle (IO L 347, 20.12.2013, lch. 487, ELI: <http://data.europa.eu/eli/reg/2013/1305/oj>).

<sup>6</sup> Rialachán (AE) Uimh. 1306/2013 ó Pharlaimint na hEorpa agus ón gComhairle an 17 Nollaig 2013 maidir leis an gcomhbheartas talmhaíochta a mhaoiniú, a bhainistiú agus faireachán a dhéanamh air agus lena n-aisghairtear Rialacháin (CEE) Uimh. 352/78, (CE) Uimh. 165/94, (CE) Uimh. 2799/98, (CE) Uimh. 814/2000, (CE) Uimh. 1290/2005 agus (CE) Uimh. 485/2008 ón gComhairle (IO L 347, 20.12.2013, lch. 549, ELI: <http://data.europa.eu/eli/reg/2013/1306/oj>).

- (21) Ba cheart, dá bhrí sin, Rialacháin (AE) 2021/2115 agus (AE) 2021/2116 a leasú dá réir.
- (22) Chun cur chun feidhme rianúil na mbeart a leagtar síos sa Rialachán seo i ndáil le caighdeáin GAEC 6, 7 agus 8, mar a liostaítear in Iarscríbhinn III a ghabhann le Rialachán (AE) 2021/2115, a áirithiú, is gá forálacha idirthréimhseacha a leagan síos a mhéid a bhaineann le leasuithe ar Phleananna Straitéiseacha CBT arna dtíolacadh ag na Ballstáit lena bhformheas ag an gCoimisiún de bhun Airteagal 119 de Rialachán (AE) 2021/2115 in 2024 agus a mhéid a bhaineann le héifeachtaí na leasuithe sin in 2024 sula bhformheasfaidh an Coimisiún na leasuithe sin.
- (23) I bhfianaise an ghá atá le níos mó solúbthachta a thabhairt d'fheirmeoirí chun a ngníomhaíochtaí talmhaíochta a dhéanamh, agus na dúshláin mhéadaitheacha, dothuarthacht na haimsire agus na héiginnteachtaí eacnamaíocha atá rompu á gcur san áireamh, agus na práinne a bhaineann le haghaidh a thabhairt ar an tionchar atá ag an raon eisceachtúil deacrachtaí agus éiginnteachtaí sin, meastar gurb iomchuí an eisceacht ar an tréimhse 8 seachtaine dá bhforáiltear in Airteagal 4 de Phrótacal Uimh. 1 maidir le ról na bparlaimintí náisiúnta san Aontas Eorpach, atá i gceangal le CAE, leis an gConradh ar Fheidhmiú an Aontais Eorpaigh agus leis an gConradh ag bunú an Chomhphobail Eorpaigh do Fhuinneamh Adamhach, a agairt.
- (24) Chun cur chun feidhme rianúil na mbeart atá beartaithe a áirithiú agus ar bhonn práinne i bhfianaise an raoin eisceachtúil deacrachtaí agus éiginnteachtaí atá roimh fheirmeoirí, ba cheart an Rialachán seo a theacht i bhfeidhm an lá tar éis lá a fhoilsithe in *Iris Oifigiúil an Aontais Eorpaigh*.

- (25) Chun ualaí riaracháin díreireacha ar fheirmeoirí beaga agus ar údaráis náisiúnta a sheachaint, ba cheart feidhm chúlghabhálach a bheith ag an díolúine ó pionóis a bhaineann le neamhchomhlíonadh na gceanglas coinníollachta agus an díolúine ó na pionóis a bhaineann le neamhchomhlíonadh na gceanglas tras-chomhlíonta a mhéid a bhaineann leis an mbliain éilimh 2024.
- (26) Ós rud é gur thosaigh an bhliain éilimh 2024 an 1 Eanáir 2024, ba cheart feidhm a bheith cheana ag na bearta a leagtar síos sa Rialachán seo i dtaca le caighdeáin GAEC 6, 7 agus 8, mar a liostaítear in Iarscríbhinn III a ghabhann le Rialachán (AE) 2021/2115, maidir leis an mbliain éilimh 2024 chun an deis a thabhairt do na Ballstáit na bearta sin a chur i bhfeidhm amhail ón mbliain éilimh sin,

TAR ÉIS AN RIALACHÁN SEO A GHLACADH:

*Airteagal 1*  
*Leasuithe ar Rialachán (AE) 2021/2115*

Leasaítear Rialachán (AE) 2021/2115 mar a leanas:

(1) leasaítear Airteagal 4 mar a leanas:

(a) i mír 3, cuirtear an méid seo a leanas in ionad phointe (a):

‘(a) is é a bheidh i gceist le “talamh arúil” talamh a shaothraítear le haghaidh táirgeadh barr nó limistéir atá ar fáil le haghaidh táirgeadh barr ach ar talamh í nó ar limistéir iad atá gan chur; sa bhreis air sin, is é a bheidh inti, fad a mhaireann an gealltanais, talamh a shaothraítear le haghaidh táirgeadh barr nó na limistéir atá ar fáil le haghaidh táirgeadh barr ach ar talamh í nó ar limistéir iad atá gan chur a cuireadh i leataobh i gcomhréir le hAirteagal 31 nó 70 den Rialachán seo, nó le hAirteagal 22, 23 nó 24 de Rialachán (CE) Uimh. 1257/1999 ón gComhairle\*, nó le hAirteagal 39 de Rialachán (CE) Uimh. 1698/2005 ón gComhairle\*\*, nó le hAirteagal 28 de Rialachán (AE) Uimh. 1305/2013 ó Pharlaimint na hEorpa agus ón gComhairle\*\*\*;

---

\* Rialachán (CE) Uimh. 1257/1999 ón gComhairle an 17 Bealtaine 1999 maidir le tacaíocht don fhorbairt tuaithe ón gCiste Eorpach um Threoraíocht agus Rátháíocht Talmhaíochta (CETRT) agus lena leasaítear agus lena n-aisghairtear Rialacháin áirithe (IO L 160, 26.6.1999, lch. 80, ELI: <http://data.europa.eu/eli/reg/1999/1257/oj>).

\*\* Rialachán (CE) Uimh. 1698/2005 ón gComhairle an 20 Meán Fómhair 2005 maidir le tacaíocht le haghaidh forbairt tuaithe ón gCiste Eorpach Talmhaíochta um Fhorbairt Tuaithe (CETFT) (IO L 277, 21.10.2005, lch. 1, ELI: <http://data.europa.eu/eli/reg/2005/1698/oj>).

\*\*\* Rialachán (AE) Uimh. 1305/2013 ó Pharlaimint na hEorpa agus ón gComhairle an 17 Nollaig 2013 maidir le tacaíocht d'fhorbairt tuaithe ón gCiste Eorpach Talmhaíochta um Fhorbairt Tuaithe (CETFT) agus lena n-aisghairtear Rialachán (CE) Uimh. 1698/2005 ón gComhairle (IO L 347, 20.12.2013, lch. 487, ELI: <http://data.europa.eu/eli/reg/2013/1305/oj>).’;

(b) i mír 4, an chéad fhomhír, cuirtear an méid seo a leanas in ionad phointe (b):

‘(b) aon limistéar den ghabháltas:

- (i) a chumhdaítear le gnéithe tírdhreacha atá faoi réir na hoibleagáide coinneála faoi chaighdeán GAEC 8 a liostaítear in Iarscríbhinn III; nó
- (ii) a bhunaítear nó a choimeádtar, fad a mhaireann gealltanais ábhartha an fheirmeora, mar thoradh ar éiciscéim dá dtagraítear in Airteagal 31.

I gcás ina gcinneann na Ballstáit amhlaidh, féadfaidh gnéithe tírdhreacha eile a bheith i ‘heicteár incháilithe’, ar choinníoll nach bhfuil siad ceannasach agus nach gcuireann siad bac suntasach ar fheidhmíocht na gníomhaíochta talmhaíochta i ngeall ar an limistéar ina bhfuil siad ar an dáileacht talmhaíochta. Agus an prionsabal sin á chur chun feidhme, féadfaidh na Ballstáit sciar uasta den dáileacht talmhaíochta a chumhdaítear leis na gnéithe tírdhreacha eile sin a shocrú.

A mhéid a bhaineann le féarthailte buana a bhfuil gnéithe scaipthe neamh-incháilithe iontu, féadfaidh na Ballstáit a chinneadh comhéifeachtaí laghdaithe seasta a chur i bhfeidhm chun an limistéar a mheastar a bheith incháilithe a chinneadh.’;

(2) leasaítear Airteagal 13 mar a leanas:

(a) i mír 1, cuirtear an fhomhír seo a leanas léi:

‘Agus caighdeáin GAEC 5, 6, 7 nó 9 a liostaítear in Iarscríbhinn III á socrú acu, féadfaidh na Ballstáit díolúintí sonracha ó cheanglais na gcaighdeán sin a bhunú. Beidh na díolúintí sin bunaithe ar chritéir oibiachtúla agus neamh-idirdhealaitheacha, amhail barra, cineálacha ithreach agus córais feirmeoireachta nó damáiste d’fhéarthailte buana, inter alia, mar gheall ar ainmhithe fiáine nó speicis ionracha, agus beidh siad teoranta i dtéarmaí a gcumhdaigh limistéir. Ní bhunófar díolúintí sonracha ach amháin i gcás ina bhfuil gá leo agus a mhéid atá gá leo chun aghaidh a thabhairt ar fhadhbanna sonracha a bhaineann le cur i bhfeidhm na gcaighdeán sin agus ní chuirfidh na díolúintí sonracha sin bac suntasach ar rannchuidiú gach ceann de na caighdeáin sin lena bpríomhchuspóirí, mar a liostaítear in Iarscríbhinn III.’;

(b) cuirtear an mhír seo a leanas isteach:

‘2a. Agus na híoschaighdeáin a shocraítear i gcomhréir le míreanna 1 agus 2 á gcur chun feidhme acu, féadfaidh na Ballstáit maoluithe sealadacha a dheonú ar cheanglais amhail teorainneacha ama agus tréimhsí a leagtar síos sna caighdeáin sin i gcás ina gcuirtear cosc, le dálaí aimsire, ar fheirmeoirí agus ar thairbhithe eile na ceanglais sin a chomhlíonadh in aon bhliain ar leith. Beidh maoluithe sealadacha den sórt sin teoranta i dtéarmaí a raoin feidhme d’fheirmeoirí agus do thairbhithe eile nó do limistéir dá ndéantar difear mar gheall ar dhálaí aimsire den sórt sin, agus ní chuirfear i bhfeidhm iad ach ar feadh na tréimhse a mbeidh fíorghá leo.’;

(3) in Airteagal 31, cuirtear an mhír seo a leanas isteach:

‘1a. Mar chuid de na héiciscéimeanna dá dtagraítear i mír 1, bunóidh na Ballstáit scéim amháin nó níos mó lena gcumhdaítear, ar thalamh arúil, cleachtais chun limistéir neamhtháirgiúla a chothabháil, amhail talamh atá gan chur, agus chun gnéithe tírdhreacha nua a bhunú, agus soláthróidh siad tacaíocht do scéimeanna den sórt sin. Is de chineál deonach a bheidh na scéimeanna sin i gcás feirmeoirí gníomhacha agus grúpaí feirmeoirí gníomhacha.’;

(4) in Airteagal 119(7), cuirtear an méid seo a leanas in ionad na chéad fhomhíre:

‘7. Féadfar iarraidh ar leasú ar an bPlean Straitéiseach CBT a thíolacadh dhá uair in aghaidh na bliana féilire, faoi réir díolúintí a d’fhéadfadh a bheith ann dá bhforáiltear sa Rialachán seo nó atá le cinneadh ag an gCoimisiún i gcomhréir le hAirteagal 122. Ina theannta sin, féadfar trí iarraidh bhreise ar leasú ar an bPlean Straitéiseach CBT a thíolacadh le linn thréimhse an Phlean Straitéisigh CBT. Ní bheidh feidhm ag an mír seo maidir le hiarrataí ar leasuithe chun na heilimintí atá in easnamh a thíolacadh i gcomhréir le hAirteagal 118(5).’;

(5) in Airteagal 120, cuirtear an mhír seo a leanas leis:

‘Ní bheidh feidhm ag an gcéad mhír den Airteagal seo maidir le leasuithe, a thagann i bhfeidhm tar éis an 31 Nollaig 2025, ar ghníomhartha reachtacha a liostaítear in Iarscríbhinn XIII.’;

(6) leasaítear Iarscríbhinn III i gcomhréir leis an Iarscríbhinn a ghabhann leis an Rialachán seo.

*Airteagal 2*  
*Leasuithe ar Rialachán (AE) 2021/2116*

Leasaítear Rialachán (AE) 2021/2116 mar a leanas:

(1) leasaítear Airteagal 83 mar a leanas:

(a) cuirtear an méid seo a leanas in ionad mhír 2:

‘2. Feirmeoirí a bhfuil uasmhéid gabháltas acu nach mó ná 10 ha de limistéar talmhaíochta a dhearbhaítear i gcomhréir le hAirteagal 69(1), beidh siad díolmhaithe ó rialuithe faoi chóras arna bhunú i gcomhréir le mír 1 den Airteagal seo.’;

(b) i mír 6, scriostar pointe (f):

(2) in Airteagal 84, cuirtear an mhír seo a leanas leis:

‘4. Feirmeoirí a bhfuil uasmhéid gabháltas acu nach mó ná 10 ha de limistéar talmhaíochta a dhearbhaítear i gcomhréir le hAirteagal 69(1), beidh siad díolmhaithe ó na pionóis dá dtagraítear i míreanna 1, 2 agus 3 den Airteagal seo agus in Airteagal 85.’;

(3) in Airteagal 104(1), an dara fomhír, pointe (a), cuirtear an méid seo a leanas in ionad phointe (iv):

‘(iv) a mhéid a bhaineann le CETFT, i ndáil le caiteachas arna thabhtú ag na tairbhíthe agus íocaíochtaí arna ndéanamh ag an ngníomhaireacht íocaíochta faoi chuimsiú chur chun feidhme na gclár forbartha tuaithe de bhun Rialachán (AE) Uimh.

1305/2013, cé is moite d’Airteagail 96 agus 97 de Rialachán (AE) Uimh. 1306/2013 a mhéid a bhaineann le tairbhíthe atá faoi réir an chórais rialaithe dá dtagraítear in Airteagal 83 den Rialachán seo;’.

### *Airteagal 3*

#### *Forálacha idirthréimhseacha*

1. De mhaolú ar Airteagal 119(8), an tríú fomhír, de Rialachán (AE) 2021/2115, an dáta a ghabhfaidh éifeacht leis na leasuithe ar Phleananna Straitéiseacha CBT a bhaineann le hathruithe ar chaighdeáin GAEC 6, 7 nó 8 a leagtar síos san Iarscríbhinn a ghabhann leis an Rialachán seo, arna dtíolacadh ag na Ballstáit lena bhformheas ag an gCoimisiún de bhun Airteagal 119(2) den Rialachán sin i ndáil leis an mbliain éilimh 2024, ní bheidh an dáta sin faoi réir fhormheas an Choimisiúin.

2. De mhaolú ar Airteagal 119(11) de Rialachán (AE) 2021/2115, féadfaidh na Ballstáit a chinneadh le haghaidh na bliana éilimh 2024 go bhfuil éifeacht dhlíthiúil ag leasuithe ar Phleananna Straitéiseacha CBT a bhaineann leis na hathruithe ar chaighdeán GAEC 6, 7 nó 8 a leagtar síos san Iarscríbhinn a ghabhann leis an Rialachán seo sula bhformheasfaidh an Coimisiún iad. I ndáil le caighdeán GAEC 8, ní fhéadfaidh na Ballstáit an cinneadh sin a dhéanamh ach amháin má dhéanann siad scéim a chur i bhfeidhm le haghaidh na bliana éilimh 2024 lena gcumhdaítear, ar thalamh arúil, cleachtais chun limistéir neamhtháirgiúla a chothabháil, amhail talamh atá gan chur, nó chun gnéithe tírdhreacha nua a bhunú, dá dtagraítear in Airteagal 31 de Rialachán (AE) 2021/2115.

Agus an cinneadh dá dtagraítear sa chéad fhomhír á dhéanamh ag na Ballstáit, áiritheoidh siad go n-urramófar prionsabail ghinearálta dhlí an Aontais, go háirithe prionsabal na deimhneachta dlíthiúla, prionsabal an neamh-idirdhealaithe agus an prionsabal i dtaobh ionchais dhlísteanacha feirmeoirí agus tairbhithe eile a chosaint, agus go gcuirfear san áireamh an gá atá ann go mbeadh a ndóthain ama ag feirmeoirí agus tairbhithe eile chun na leasuithe a chomhlíonadh.

*Airteagal 4*  
*Teacht i bhfeidhm agus cur i bhfeidhm*

Tiocfaidh an Rialachán seo i bhfeidhm an lá tar éis lá a fhoilsithe in *Iris Oifigiúil an Aontais Eorpaigh*.

Beidh feidhm ag Airteagal 2, pointí (2) agus (3), agus an Iarscríbhinn amhail ón mbliain éilimh 2024.

Beidh an Rialachán seo ina cheangal go huile agus go hiomlán agus beidh sé infheidhme go díreach i ngach Ballstát.

Arna dhéanamh i/in/sa ...,

*Thar ceann Pharlaimint na hEorpa*  
*An tUachtarán*

*Thar ceann na Comhairle*  
*An tUachtarán*

---

## IARSCRÍBHINN

Leasaítear Iarscríbhinn III a ghabhann le Rialachán (AE) 2021/2115 mar a leanas:

(1) cuirtear an méid seo a leanas in ionad na hiontrála le haghaidh GAEC 6:

GAEC 6	Cumhdach íosta ithreach chun nach mbeidh an ithir lom le linn na dtréimhsí is íogaire, de réir mar a chinneann na Ballstáit****.	Cosaint ithreacha le linn na dtréimhsí is íogaire
--------	--	---

\*\*\*\* Féadfaidh na Ballstáit, go háirithe, an tréimhse fais ghearr a eascraíonn as fad agus déine thréimhse an gheimhridh sna réigiúin lena mbaineann a chur san áireamh.;

(2) cuirtear an méid seo a leanas in ionad na hiontrála le haghaidh GAEC 7:

GAEC 7	Uainíocht na mbarr i dtalamh arúil, seachas i gcás barra a fhásann faoi uisce. Ina theannta sin, féadfaidh na Ballstáit a chinneadh cead a thabhairt d'fheirmeoirí agus do thairbhithe eile an caighdeán seo a chomhlíonadh le héagsúlú barr*****.	Acmhainn na hithreach a chaomhnú
--------	--	----------------------------------

\*\*\*\*\* Is é a bheidh san uainíocht athrú barr ar leibhéal na dáileachta talún (seachas i gcásanna barra ilbhliantúla, féar agus foráiste luibheach eile, agus talamh atá gan chur), lena n-áirítear na barra tánaisteacha a bhainistítear go hiomchuí.

Ar bhonn éagsúlacht na modhanna feirmeoireachta agus na ndálaí agra-aeráide, féadfaidh na Ballstáit a údarú sna réigiúin lena mbaineann cleachtais eile maidir le huainíocht fheabhsaithe barr le barra léagúmacha nó le héagsúlú barr a bhfuil sé d'aidhm acu acmhainn na hithreach a fheabhsú agus a chaomhnú i gcomhréir le cuspóirí an chaighdeáin GAEC seo.

Agus ceanglais éagsúlaithe barr á sainiú acu, urramóidh na Ballstáit na híoscheanglais seo a leanas:

- (a) i gcás ina bhfuil méid na talún arúla i ngabháltas idir 10 agus 30 ha, is é a bheidh san éagsúlú barr talamh arúil gabhátais a shaothrú le dhá bharr éagsúla ar a laghad ar an talamh arúil sin; ní bheidh níos mó ná 75 % den talamh arúil sin faoin bpríomhbharr;
- (b) i gcás ina bhfuil méid na talún arúla i ngabháltas níos mó ná 30 ha, is é a bheidh san éagsúlú barr talamh arúil gabhátais a shaothrú le trí bharr éagsúla ar a laghad ar an talamh arúil sin; ní bheidh níos mó ná 75 % den talamh arúil sin faoin bpríomhbharr agus ní bheidh níos mó ná 95 % den talamh arúil sin faoin dá phríomhbharr le chéile.

Féadfaidh na Ballstáit gabhátais ar fíor an méid seo a leanas ina leith a dhíolmhú ó na hoibleagáidí faoin gcaighdeán seo sna cásanna seo a leanas:

- (a) tá níos mó ná 75 % den talamh arúil iontu in úsáid chun féara nó foráiste luibheach eile a tháirgeadh, gan chur, in úsáid chun barraí léagúmacha a shaothrú, nó faoi réir teaghlaim de na húsáidí sin;
- (b) is ionann níos mó ná 75 % den limistéar talmhaíochta incháilithe atá iontu agus féarthailte buana, nó tá níos mó ná 75 % den limistéar talmhaíochta incháilithe atá iontu in úsáid chun féara nó foráiste luibheach eile a tháirgeadh nó chun barra atá faoi uisce ar feadh cuid shuntasach den bhliain nó cuid shuntasach de thimthriall na mbarr a shaothrú, nó faoi réir teaghlaim de na húsáidí sin; nó

(c) tá suas le 10 ha de thalamh arúil iontu.

Féadfaidh na Ballstáit uasteorainn a thabhairt isteach maidir leis an limistéar a chumhdaítear le barr aonair chun monashaothrú mór a chosc.

Measfar go gcomhlíonann feirmeoirí a dheimhnítear i gcomhréir le Rialachán (AE) 2018/848 an caighdeán GAEC seo.’;

(3) cuirtear an méid seo a leanas in ionad na hiontrála le haghaidh GAEC 8:

GAEC 8	– Gnéithe tírdhreacha a choinneáil – Cosc ar fhálta agus crainn a ghearradh le linn shéasúr goir agus tógála na n-éan – Mar rogha, bearta chun speicis ionracha plandaí a sheachaint	Gnéithe neamhtháirgiúla a chothabháil chun an bhithéagsúlacht ar an bhfeirm a fheabhsú
--------	--	--

’.